

李文襄公奏疏

李文襄公奏疏目錄

題稿卷之八

督師

海洋獲捷招撫偽將林雲林麒詹天樞船兵來歸

會剿江西子午口獲捷

四請蠲免被兵地方錢糧

報明援閩官兵數目並浙省情形

會剿江西玉山縣八仙洞獲捷

密陳邊防佈置機宜

招募新兵

遴補營員

請調江南官兵協防要汛

請撤援閩官兵回浙

石塘捷功恢復雲和縣

遵例自陳乞罷

遵諭自陳乞罷

請免荒蕪地方錢糧

陳言難民子女

南鎮雙頭洞獲捷

李文襄公奏疏卷八

男 鍾麟編次

海洋獲捷招撫偽將林雲林麒等船兵來歸疏

總督浙江等處地方軍務兼理糧餉兵部尚書兼都

察院右副都御史正一品臣李之芳謹密

題爲海島賊氛尙熾臣謹密飭勦撫彙報情形仰祈

睿鑒事案據定海鎮總兵官牟大寅象協副將汪國祥等
報又准水師提督臣常進功咨報又據溫州鎮總兵
官陳世凱報各到臣該臣看得浙省陸地渠逆雖經
勦撫無遺而沿海一帶屢據投誠人吐供咸稱鄭逆

分佈僞五鎮各統領水師船隻甚多凡寧紹台溫等處各汛洋面或乘潮長風便之時或於昏夜陰雨之會連帆窺伺邊海延袤二千餘里在在可以登犯不比陸地之寇可以扼要者備各鎮將奔馳防援刻無寧息羽書絡繹今浙省安插新附投誠不下數萬皆鷹眼未化之徒內地旣資兵力彈壓而沿海官兵總計則多分佈則少每有汛廢兵單顧此失彼之慮臣夙夜籌畫多方布置密移提臣并飭行各鎮將設法勦撫務期鞏固海疆陸續准提臣及據鎮將堵剿殺賊并招撫僞官兵情形前來當此海疆多事激勵有

功將士與撫綏向化之衆皆屬緊要機宜除零星堵
禦不及議敘之例者臣自酌行獎勵并投誠人衆無
多者臣亦分別賞賚安插外如象山副將汪國祥等
於廟嶺湖邊地方殺賊五百餘人生擒三十九名得
獲器械等項又溫州鎮總兵官陳世凱等於除夕元
旦之際大夥賊踪一時分犯各汛官兵冒雨衝擊經
兩晝夜處處嚴謹不使一賊登犯打壞賊船淹死賊
衆甚多又水師提督臣常進功等招到偽副將林雲
等溫州鎮總兵官陳世凱等招到偽副將林麒等皆
率領船兵來歸又招到偽副將詹天樞等殺偽將麥

仁來歸提臣鎮將俱能盡心勦撫保固巖疆伏乞

勅部議敘以勵有功至偽副將林雲林麒麟等帶領船兵詹
天樞等翦逆自効與平常投順者不同相應題

請并予甄錄以鼓向化至殺賊傷亡官兵另俟彙

題駕到投誠船隻如係堪用堪修卽補沿海戰船缺額

容臣通查另疏

題報所有勦撫海逆情形臣謹彙疏密

題伏乞

皇上睿鑒施行

康熙十七年二月二十八日題奉

旨據奏副將汪國祥等擊敗游逆又提臣常進功等招撫
到偽副將等可嘉着議奏兵部知道

江西子午口獲捷疏

總督浙江等處地方軍務兼理糧餉兵部尚書兼都察院右副都御史正一品臣李之芳謹密

題爲擊敗鄰省逆寇以安地方事竊照江西岐界餘氛自經臣

題請會剿之後凡一應勦撫機宜無不悉力而行見今饒廣等屬次第就平尙有未靖餘孽臣以江省官兵見在搜剿各屬地方皆有江省經制官兵到汛且浙省要地亟資彈壓是以前經

題明將援剿江西官兵酌量陸續調回在案仍於交界

處所設兵守禦偵獲今於康熙十七年三月二十四日據衢協副將李承恩等塘報到臣該臣看得江西岐界巨寇如僞將軍程鳳下僞官兵并僞總兵陳山林爾瞻等俱經臣調度官兵勦蕪始盡廣信等處尚有未靖餘孽臣於常山開化駐劄官兵備禦屢據報江省餘寇數千在廣信所屬往來流突今據飛報賊衆侵犯玉山之于午口等處殺掠人民臣查于午口雖係江西地方逼近浙界向係賊寇屯兵處所不可復令盤踞以致荼毒殘黎卽飛調臣標叅將蔣懋勛統領衢協都司夏必成帶領官兵星馳撲勦今據

報康熙十七年三月二十八日官兵前至賊寨口子奮勇鏖戰擊敗賊衆當陣殺賊六百餘名攻入賊寨木城又殺賊三百餘名得獲器械等項餘賊奔遁塘報前來除一面移咨江西督臣酌發官兵相機會勦外緣係賊寇逼界官兵進剿獲捷情形合將在事有功人員造冊送部臣謹密疏

題報伏乞

皇上睿鑒施行

康熙十七年閏三月十六日題奉

旨據奏遣發官兵於子午口地方殺敗賊衆得獲器械等

項具見曆士奮勇作嘉在事有功人員着議敘具奏兵部知道

請蠲被兵地方錢糧第四疏

總督浙江等處地方軍務兼理糧餉兵部尚書兼都察院右副都御史正一品臣李之芳謹

題爲殘疆困苦已極難民號救堪憐謹遵

恩詔亟

請蠲賑大沛

皇仁以救百萬生靈事據浙江布政司布政使李士楨呈詳到臣該臣看得浙省自康熙十三年閩變以來衢溫處等府屬地方與閩逼近被陷最先恢復最後臣等欽遵

恩詔將應行蠲免事宜已經三疏上

請百姓沾危慘苦情形自蒙

皇上洞鑒惟是部臣因需餉之際再三駁查仍令分別苦
累輕重具題再議臣遵行布政司確議今據該司行
據各屬詳覆前來竊惟恤民以固邦本裕賦以資

國用兩者原屬並重然必使有可存之民而後有可徵
之賦今凡賊所蹂躪之地民之轉於溝壑者業已過
半矣僅存殘黎瘡痍哀痛之聲未絕於耳室家離散
田廬蕩然環顧謀生之計一蕪可恃其去死無幾所
恃以存其一綫之生機者惟望

天恩將康熙十六年并以前錢糧盡予蠲免庶可拯救保全若云苦累輕重不同必有所以不同之故卽如臣等會

題備陳地方等事一疏分別極苦次苦蓋以失陷恢復或久或近從此分別至江山等各屬與閩變相終始其失陷恢復年月及百姓萬死一生傷心慘目之狀備晰前疏仰望

朝廷非常之恩實屬一體但部議仍令分別臣等再三酌查如西安龍游遂安湯溪原止將被寇殘害最淡之各都額

請全蠲此卽分別之處也其餘各屬極力搜求僅有溫屬樂清一縣雖旋復旋夫亦已淪陷三年因賊兵亦旋去旋來尚與永久盤踞者稍間自平定之後多方招集窮黎漸次來歸鵲衣鶴面慘苦與各處相似但以現在戶口校其多寡不致如各縣之空虛除十五年并以前錢糧地方未復不可再問其十六年錢糧或可責以勉力供輸此於萬分慘苦無可分別之中強爲設法尚難必其按額全完其他各縣衛所地方欲再指一處爲次苦實不可得伏念

詔旨頒行乃普天其被之恩而浙民尚未蒙

恩闕省全蠲乃見今已行之例而浙民未得引例萬姓哀
號考成交迫爲有司者業已盡膺罷譴使其尚可追
呼豈不自愛功名總爲此甫離湯火喘息垂盡之民
田荒戶絕無法可施若不亟沛

恩綸無論舊逋終不能完徒使新逋愈積現徵復虧雖日
黜一官無益於事而地方元氣從此不可挽回矣且
浙東幸賴

天威平定投戈效順安插各屬者不下數萬必使四民安
堵庶幾鷹眼漸化如朝夕不保之窮民復加以催科
彼妻子旣已散失田畝旣已拋荒飢寒竝切析楊在

前計窮勢迫地方之憂尚未可知臣等每念兵革之餘傷慘已極欲期民皆樂業復還舊觀實非易事惟獨此不可復徵之賦將來休養生息仍成

國家財賦之地者卽在於此臣等屢瀆

宸聰爲恤民計未嘗不爲籌餉計也伏乞

皇上俯念江山等各縣衛所及西龍遂湯四縣分晰之各都皆係極苦

特賜俞允臣等前疏所請將康熙十六年并以前一應本折錢糧照閩省全蠲其樂清一縣自康熙十五年并以前本折錢糧應請一例蠲免外康熙十六年錢糧

議令地方官設法勸輸仍請寬限考成庶可漸次徵解臣謹會同撫臣陳秉直合詞具

題仰祈

皇上俯賜全覽

勅部議覆施行

康熙十七年四月十六日題奉

旨該部知道

報明援閩官兵數目並浙省情形疏

總督浙江等處地方軍務兼理糧餉兵部尚書兼都察院右副都御史正一品臣李之芳謹密

題爲報明調發援閩省官兵並浙省近日情形仰祈
睿鑒事該臣看得閩省海澄告警綠旗官兵不敷調撥承
准大將軍康親王諭調浙省官兵查浙省自援勦鎮
標官兵奉裁江南京松各營官兵調回原汛惟存向
來經制官兵如寧紹台溫各鎮營俱屬逼臨邊海分
佈防守毋患汎廣兵單近日海氛更肆猖獗據各鎮
將塘報鄭逆下僞總督朱天貴統領僞五鎮官兵分

踪飄忽或駕賊船八九十隻或一百餘隻成羣來往
刻圖窺犯官兵晝夜堵禦在在戒嚴是沿海營伍已
無一兵可以抽調至臣標五營官兵中左後三營多
已赴閩見在福州漳州右營見在防守仙霞關前營
見在會勦江西餘寇前因江右岐界賊氛復熾經臣
添發官兵前往玉山縣千午口地方勦賊獲捷案經
具疏

題報在案又准江西提督臣趙賴香稱賊首楊一豹等
現踞江西鉛山之洪山等處賊首江拐子等現踞永
豐縣之封禁山等處賊首何秉誠等現踞玉山縣之

火燒碓等處俱與福建浦城崇安二渡關浙江江山
開化常山地方相接各會迅發官兵協力堵剿又據
臣標叅將閻進等塘報賊首李日生洪成隆等屯劄
玉山縣屬之八仙洞老鼠洞等處臣卽復令叅將閻
進等衛協都司夏必成嚴協都司馬起龍等各帶官
兵滾入夾剿現在另疏

題報是存留衛城之兵已屬寥寥無幾至撫標金嚴杭
嘉湖各營設兵原少業經先前抽調援閩且各屬安
插投誠不下數萬皆鷹眼未化之徒不可無兵彈壓
揆度地方形勢浙省正非無事之時官兵實難抽調

惟是閩省需兵甚亟承准大將軍康親王密諭臣卽多方酌量查福建益亭地方界連三省爲浦城之外藩當江右之衝要且益亭所轄王家橋木城二渡等關隘口甚多目今永豐等處賊寇正在猖獗欲鞏固浦城要地尤須先設重兵於益亭大將軍康親王旣令臣策應浦城并撥官兵防守益亭臣卽一面相機策應一面權宜飛調金協都司郭正明紹協守備李應科嘉興營守備薛受益各帶領官兵星赴益亭分佈防守約前赴閩各營官兵與今續調進閩官兵通計共四千五百餘員名浙汛兵單四應不敷臣現在

多方籌畫設法佈置所有承准王諭調發官兵援閩
並浙省近日情形相應密疏

題報伏乞

皇上睿鑒施行

康熙十七年五月初二日題奉

旨兵部知道

會勦江西玉山八仙洞等處獲捷疏

總督浙江等處地方軍務兼理糧餉兵部尚書兼都察院右副都御史正一品臣李之芳謹密

題爲會勦鄰省逆寇攻克洞寨獲捷事康熙十七年四月初八日據衢協副將李承恩報江西賊衆在德興所屬陳村一帶出沒靡常至嶺頭大橋頭等處皆爲逆踞現今賊兵愈多日加猖熾等情又據臣標參將蔣懋勛報江西玉山縣屬祕口洞口等處盡係賊巢意在侵犯浙界各汛防守兵單合請裁奪等情又准江西提督臣趙賴咨稱賊首楊一豹等踞江西鉛山

縣之洪山賊首江拐子等踞永豐縣之封禁山賊首
何秉誠等踞玉山縣之火燒碓俱與福建浦城崇安
二渡關浙江江山開化常山地方相接咨會迅發官
兵協力堵剿等因臣查江西各路賊寇屯剝處所逼
近浙界常開等處宜急爲夾擊隨密授臣標叅將閻
進機宜令其帶領在衛官兵并嚴協都司馬起龍等
由開化縣屬之華埠進剿又令臣標叅將蔣懋勛等
帶領官兵由常山縣屬之徐家嶺進剿并飭各該將
等揆明逆賊老巢迅速飛報聽候調度所到地方尤
須申明紀律毋許秋毫滋擾隨據叅將閻進等確據

賊首僞都督李日生等擁衆二千餘人盤踞玉山縣屬之八仙洞老巢又僞中路提督總兵洪成龍等帶領賊衆三千餘人盤踞玉山縣屬之二十六都老鼠洞又名仙姑洞各倚險負固流毒四處不可不亟爲撲勦等情臣卽飛檄該將等刻日會師夾勦先取八仙洞乘勝攻克老鼠洞務須一鼓蕩平仍據江西進兵情形約會聲援去後今據叅將閻進蔣懋勛等塘報又准江西提督臣趙賴咨各到臣該臣看得江西逆寇屯劄玉山縣屬子午口等處逼近浙界臣卽遣發官兵擊敗獲捷經臣具疏

題報在案今又據各將領飛報臣查逆賊屯劄處所雖係江西地方倘不亟爲翦除蔓延日久恐成大患臣隨密令臣標叅將閔進蔣懋勛等統領官兵會合江西官兵深入夾勦威能奮勇用命不憚艱險隨於康熙十七年四月十六日斬賊一千三百餘名連破三關攻克八仙洞得獲器械等項焚燬巢穴又於十七日連破四關攻克老鼠洞斬賊一千六百餘名陣斬僞遊擊都司等員得獲器械僞劄等項焚燬巢穴此皆各官兵同時齊進越險深入故能連戰獲捷攻克洞寨功勤難泯除江西各營有功人員應聽江西督

臣董衛國

題報外所有臣調度援勦在浙各員造冊送部臣謹密
題伏乞

皇上睿鑒施行

康熙十七年五月十三日題奉

旨覽卿奏遣發官兵於玉山縣八仙洞等處地方屢次殺
敗賊衆陣斬僞遊擊等得獲器械等項焚燬賊巢具見
調度有方將士奮勇可嘉在事有功人員着議敘具奏
兵部知道

密隊邊防佈置機宜疏

總督浙江等處地方軍務兼理糧餉兵部尚書兼都察院右副都御史正一品臣李之芳謹密

題為提臣領兵援閩沿海形勢單虛臣謹密陳邊防佈置機宜仰祈

睿鑒事康熙十七年五月二十日准提督臣石調聲撫臣陳秉直咨又據溫州鎮總兵官陳世凱呈報各到臣該臣看得浙江海邊延袤數千餘里通潮港口甚多賊船皆可乘風直入是以一營必有數十汛一汛必有十數臺更設城寨以資扼守徃時酌定營制當海

氛平靖之時意在省兵雖按汛設立而額數俱少邇來海氛日熾臣與提鎮諸臣多方備禦先經節次

題報在案今提臣石調聲奉

旨援閩除帶提標官兵外又調溫台官兵共足精兵三千名已經啟行沿海鎮將咸以兵力愈單汛守掣肘請兵貼防但浙省前後援閩官兵共計七千五百有餘如撫標嘉湖杭金嚴紹各營俱抽調已多臣標官兵除援閩外盡發會剿江西餘寇并防守仙霞關各屬營伍在在單寡沿海一帶竟無從貼防海寇逼處門庭近日更加猖獗疊據塘報連踪或七八十隻至一

百三四十隻處處停泊官兵奔走堵禦晝夜不息實
有顧此不能顧彼之慮臣自用兵以來無時不以節
餉爲念是以援勦鎮奉裁之後復將江南京口松江
等營官兵具

題撤回實期就現在兵額殫心籌畫以鞏封疆今閩省
又調去多兵事出意外軍機緊要援兵旣不敢

請畱

國用正繁懸額又不致

請補臣夙夜焦思展轉無策當此兵勢單虛之時不得不
設法佈置如台屬營汛向係黃巖鎮管轄今旣已改

鎮爲提則鎮所舊轄之地不便空懸且水師尚無戰
船之際臣前

請將寧海太平等營令水師提臣暫爲統轄部議以水陸
各有分管未經允行惟因邊海現在多事是以台屬
寧海等汛係陸路提標官兵撥赴協防今提臣石調
聲援聞向來撥協之兵皆已隨行寧海太平一帶俱
係衝邊險汛若專恃該營額兵防守甚爲單薄恐誤
事機臣與水師提臣常進功咨商將陸提官兵原防
今撤處所盡易水提官兵補防庶台屬地方得藉就
近策應以固疆圉至寧屬除定海營外其餘奉化象

山等汛向係黃巖鎮管轄當日寧屬地方不屬定海鎮而遙統於黃巖鎮實爲舍近就遠鞭長不及且黃鎮已經議裁故奉象等汛亦係陸路提標撥兵遊巡協防今亦調撤入閩僅有象協寧波城守及提標分汛大嵩甯防郡城官兵汛守不敷難資應援如以黃巖鎮舊轄寧屬之故并令水師提臣兼顧則黃寧相去數百餘里海寇窺犯恒在瞬息之間恐不及事查定海鎮駐劄寧屬聲息相聞應接近便臣今照會定海鎮牟大寅將鄞象奉慈等汛兵單處所撥兵貼防庶寧屬地方亦有聯絡呼應之勢矣至溫屬各營所

調援閩之兵不多應責成鎮臣陳世凱拜音達禮將
現在官兵悉心備禦以固地方可也總因游氛正在
猖熾官兵調發單虛事勢艱難封疆重大臣所以酌
議權宜措置雖用兵之際原不拘平時已定之制但
提鎮俱係重臣伏乞

天語申飭俾各勵職守共保嚴疆并請

勅部覆議將台屬地方令提臣常進功暫爲統轄調度將
寧屬地方令鎮臣牟大寅暫爲管轄策應統候提臣
石調聲回浙之日再議惟是浙閩同一海洋賊情臣
測風帆倏忽兩省原無緩急之分仰祈

皇上睿鑒俟聞省寇警稍平卽將浙省官兵先准撤回則
邊防有恃矣臣謹密疏具

題伏乞

皇上睿鑒

勅部議覆施行

康熙十七年六月初七日題奉

旨兵部議奏

招募新兵疏

總督浙江等處地方軍務兼理糧餉兵部尚書兼都察院右副都御史正一品臣李之芳謹密

題爲請

旨事康熙十七年七月初十日准兵部密咨開該議政王等題前事內開該臣等查得浙省綠旗兵丁陸續調撥福建者甚多浙省近海關係最要兵額宜增應請勅下浙江總督李之芳巡撫陳秉直如有家眷強健精兵易於招募卽一面招募一面速行奏

聞彼時再將數目議定具題倘招募不出亦將緣由速行

具題可也等因康熙十七年七月初一日題本日奉
旨依議速行欽此爲此合咨欽遵查照施行等因到臣准
此該臣看得浙省各鎮標協營官兵前後調援閩省
者共計七千五百有餘沿海賊踪正在猖獗鄰省又
當多事兵力實係單虛今准部文兵額宜增行臣等
招募速行具

題再將數目議定等因臣卽飛檄各營迅速招募有家
眷強健兵丁去後合先具

題其應募兵數聽部議覆但招募之法原係陸續驗收
不能即時成旅且新兵亦須演練整齊方得實用若

所募之兵卽議酌補各營調缺之數便應先將衝要缺多處所隨時分發各自收伍訓練如所募之兵議令會集一處另候調度應亟議設官統領約束庶不至漫散無紀至于盔甲器械皆所立需查裁存撥勦鎮甲械除陣失及見在附支兵丁隨帶外臣一面查明存貯堪用實數并舊械可以修理者相應修理應用尙有不敷者作何動支製造其兵丁應募驗收之日卽須予以糧餉作何支給馬步戰守作何定額皆宜預爲酌定行臣等遵奉請

勅部議請

李...
旨定奪...謹會同撫臣陳秉直合詞密疏具
題伏乞

皇上睿鑒施行

康熙十七年七月十一日題奉

旨該部速議具奏

遴補營員疏

總督浙江等處地方軍務兼理糧餉兵部尚書兼都察院右副都御史正一品臣李之芳謹密

題爲浙省正當多事要缺刻難乏員臣謹遵例遴補以資防勦事康熙十七年七月三十日准兵部密咨爲請調賢能文武等事內開該議政王等會覆福建總督姚啓聖題前事等因移咨到臣該臣看得福建督臣姚啓聖

題請調用浙省將弁臣標前營叅將蔣懋勛中營守備王文魁提標中營叅將王英左營遊擊曾承水師提

標前營遊擊劉詔定海營參將高祿寧海營參將林
葵嘉興左營守備薛受益衢協左營守備康成功右
營守備馬伏秀嚴協右營守備吳德榮等皆臣自用
兵以來試用選拔屢著軍功勇敢歷練之員浙省多
事之時正資禦侮今奉

旨移調當漳泉海寇猖獗臣義切同仇隨卽飛檄各官遵
照前赴惟是所遺員缺皆衝疆險汛現在封壘之地
非得諳練能員難以勝任除參將王英遊擊曾承先
隨提督臣石調聲進勦漳泉應聽提臣就近酌

題外查定例內開浙江近海沿邊缺出准該督提將才

技優長諳練地方銜缺相當人地相宜之人保

請題補又准兵部咨開如係用兵與賊接壤之處緊要缺
出准該督提將果有才能勤勞昭著之人仍照例保
題等因奉

旨通行在案臣今詳校功能酌量才地如定海寧海二營
及兩提標皆邊海緊要查有太湖營遊擊功加副將
姚世熙堪補定海營參將提標右營遊擊郭守金堪
補寧海營參將又有江南京口左路鎮標遊擊馬從
龍狼山鎮標遊擊楊亨俱經在浙征勦臣熟知其才
能雖已撤回江南因原缺已補有人尚在守候數年

戰場勞績之員久置閑散殊爲可惜若卽補用足勸
有功馬從龍堪補提標右營遊擊郭守金所遺員缺
楊亨堪補水師提標前營遊擊劉詔所遺員缺查楊
亨雖係福建投誠但今用人之際如叅將王英林蔡
遊擊曾承皆與楊亨一體之人先經補用著有成績
相應援照此例

題補至臣標守備王文魁嘉興營守備薛受益現征調
在閩衛協守備康成功馬伏秀現在江閩交界防勦
嚴協雖稱內地今現調該營都司馬起龍赴延平等
處尚需領兵之員此各員缺皆係緊要查有臣標功

加遊擊劉澤淡堪補臣標中營守備臣標功加署遊擊張文福堪補嘉興左營守備水師提標前營千總功加署都司僉書朱子龍堪補衛協左營守備定海營千總周文進堪補衛協右營守備臣標左營千總功加署守備劉發堪補嚴協右營守備以上各員皆係歷經戰陣才技優長勤勞昭著內劉澤淡張文福論銜應補都司僉書惟因領兵援勦亟資能員暫以守備補用總爲需才起見臣謹遵例保

題至臣標前營叅將及太湖營遊擊員缺查有奉

旨以叅將用之鮑輔仁以遊擊用之李鳳翔俱行臣遇缺

題補鮑輔仁堪補臣標前營叅將李鳳翔堪補太湖營

遊擊仰祈

皇上允臣所請庶得收臂指之效巖疆攸賴矣除干總宋
子龍周文進劉發履歷一面查取另咨送部外臣謹

密

題伏乞

睿鑒

勅部議覆施行

康熙十七年八月初七日題奉

旨兵部議奏

請調江南官兵協防要汛疏

總督浙江等處地方軍務兼理糧餉兵部尚書兼都察院右副都御史正一品臣李之芳謹密

題爲兵力單虛已極巖疆事勢可憂經制補額未敷招募尚難應急仰祈

睿鑒迅調鄰近成旅以資戰守事康熙十七年八月初一日准兵部密咨爲請

旨事內開職方清吏司案呈奉本部送密封內該議政王等會覆浙江總督李之芳題前事等因康熙十七年七月十一日題本月二十日奉

旨該部速議具奏欽此密封到部又經兵部繕頭牌啓

奏浙督李之芳等題爲遵

旨招兵一疏奉

旨該部速議具奏欽此查得先經議政王等會題浙省近
海關係最要兵額宜增令浙江總督李之芳巡撫陳
秉直如有家眷強健精兵易於招募卽一面招募一
面速行奏

聞彼時再將數目議定具題等因今該督等請定應募兵
數前來此原係議政王會議欲定數目之事應仍交
與議政王等議覆等因康熙十七年七月二十三日

奏本日奉

旨依議欽此該臣等會議得浙江總督李之芳疏稱浙省官兵前後調援閩省共計七千五百有餘兵力實係單虛今准部文行臣等招募臣卽檄各營迅速招募其應募兵數聽部議覆若所募之兵卽議酌補各營調缺之數便應先將衝要處所隨時分發如議令會集一處另候調度則應亟議設官統領至於盔甲器械臣查明貯庫堪用并可以修理者修理應用尚有不敷者作何動支製造糧餉作何支給馬步戰守作何定額皆宜預爲酌定行臣等遵奉等因查先經臣

等會議浙省近海兵額宜增應請

勅下浙江督撫如有家眷強健精兵易於招募卽一面招募一面速行奏

聞彼時再將數目議定具題在案今既經該督檄行招募具題前來應照江西新近添招之數令其招募有家眷強健兵丁五千名馬步戰守俱照通省經制兵丁之例其所募兵丁不必另設官員統領應聽該督按要緊地方分附各營約束仍將分附各營數目報部俟調赴閩省官兵回浙之日將此項添募兵丁再議裁減所需盔甲器械除將存貯堪用并可以修用者

修理充用外不敷者速行造給其製造所需銀兩作何動支兵丁錢糧作何撥給聽戶工二部議可也等因康熙十七年七月二十四日題本月二十六日奉旨依議速行欽此密封到部移咨到臣該臣看得浙省官兵調發福建甚多前經議政王等會議浙省近海關係最要兵額宜增奉

旨行臣等招募是蒙

皇上明見萬里俯念鞏固巖疆必資兵力誠萬不可緩之計臣等一面分令各營招募一面

題請定數今准部文議定五千之數將緊要地方酌量

添補但新兵募足尚需時日更待簡練方可成旅非
見在實用之兵今浙省自溫台寧紹一帶鄭逆遣發
賊踪分踞洋面臣詢據投誠偽遊擊陳紹先偽都司
鄒虎臣等供稱偽正總督朱天貴偽張都督偽周都
督等劄管台州近洋以至舟山偽副都督劉天福等
劄管游山茅平偽四鎮陳義等劄管游山連社偽九
鎮劉祖漢等劄管大青山鄭逆近又添發偽六鎮黃
炎等劄管玉環山刻圖窺犯風帆倏忽處處可登沿
海將士無分寒暑晝夜擐甲堵禦所備之處愈多則
兵力愈患其少且溫台游洋卽連接福興漳泉之海

洋乘風而至不待終日今賊勢方張狡謀叵測毒爲
乘虛掩襲之計卽如先犯海澄及大兵盡聚於漳則
又移犯泉州已有明驗倘或見大兵節次南下出我
不意并力聯踪直犯浙境若無重兵何以禦敵至閩
江接界山寇四發逼近浙閩大路見奉大將軍康親
王令諭三省會勦是浙省三面皆用兵對壘之地卽
內地往年賊寇投戈向化原爲懾於兵威然不軌之
徒如邵良楞等造謀散劑奸萌未息今投誠安插各
屬者不可勝計明見各處營伍形勢單弱豈無生心
兩年浙省幸而無事原藉將士百戰之餘無不聞警

直前而臣等夙夜申儆不遺餘力堵防今兵旣頻次
調發而歷練勇敢緩急可恃之將亦多已遵

旨調去在閩省誠爲緊急然浙省賊氛不爲不熾使因循
目前不亟整備設有不虞必致束手無措臣前請撤
回江南援浙官兵五千餘員名原爲

朝廷節餉起見但今日事勢又與前日不同環顧地方在
在可愛若一蹉跌收拾甚難恐所費且不貲矣臣等
念切封疆寢食俱廢謹劄切痛陳於

皇上之前伏乞

睿鑒浙省重地宜防逆賊乘虛突犯必得訓練勁旅方克

有濟請

勅將江南官兵立調三千赴浙固守衝要俟募兵成旅之日分發汛守庶巖疆稍有可恃統計新募與請調之數尚不及經制所缺之額臣等務期多方佈置勉力支撐以保地方仰祈

皇上俯賜俞允封疆幸甚臣謹會同燕臣陳秉直合詞密題伏乞

勅部議覆施行

康熙十七年八月初七日題奉

旨議政王貝勒大臣會議具奏

請撤援閩官兵回浙疏

總督浙江等處地方軍務兼理糧餉兵部尚書兼都察院右副都御史正一品臣李之芳謹密

題爲鄰疆海汛突犯堪虞亟

請撤回原兵以資堵禦事據各鎮將塘報到臣該臣看得浙省衢屬界臨江閩仙霞一關首當喉鑰崇山峻嶺在在爲鄰寇出沒之地溫台寧紹等府逼近海洋而定海關尤爲東浙門戶當山海交訌之際惟藉厚集兵力分佈設防自康熙十五年間調發臣標撫標及杭嘉湖各協營在衢勦禦之兵隨同大兵入閩數年

恢勦現駐漳泉繼則提督臣石調聲統師援閩將寧
台各屬防汛官兵抽撤啓行經臣具有兵力單虛已
極等事一疏請調江南官兵赴浙防勦嗣准部文浙
省近海關係最要兵額宜增行臣招募兵丁五千名
按緊要地方分附是浙省衝險需兵情形久在

皇上睿鑒中矣但當軍餉浩繁之時凡有可省錢糧者臣
自應多方撙節查有援勦鎮裁存附支兵一千餘名
卽撥入募兵額內所增新兵僅三千餘名在浙省先
後陸續調閱者不下萬數而以前項新兵分派沿海
衝邊之重汛所在有捉襟露肘之虞且邇來衝屬開

朝廷之封疆防閩防浙總屬固圉之至計向年尙有援浙
江南京松各營兵五千餘名惟因節省行糧地方稍
定隨即具

題發回不敢久留糜費今亦不敢復請鄰省官兵赴浙
所有浙省各標協管兵隨征入閩歷有年所東征西
勦陣亡已多嚴寒酷暑病故大半卽令另募補伍者
率非當日之勁卒矧今漳泉海逆屢經大創勢亦漸
平且閩省綠旗官兵又經

題准增設兼有江南山東河南標京口奉調及隨帶之
兵輻輳到閩浙省前項官兵留閩不見其多回浙實

屬有濟更可省隔省之行糧資浙汎之兵力誠一舉而兩便也臣以近日山海賊寇情形交迫故敢激切敷陳仰祈

皇上俯鑒特賜俞允有裨軍

國誠非淺矣除續調進閩及現在延建官兵接壤江西仍留該汎防守容臣另行題

請外臣謹會同撫臣陳秉直署提督事水師提督臣常進功令詞密

題伏乞

勅部速議施行

康熙十八年正月二十六日題奉

旨兵部議奏

石塘捷功恢復雲和縣疏

總督浙江等處地方軍務兼理糧餉兵部尚書兼都察院右副都御史正一品臣李之芳謹

題爲呈報殺敗堵塞進閩嶺口逆賊恢復雲和縣事該

臣看得處屬石塘地方自逆賊變叛以來僞都尉連登雲等率領賊兵二萬有餘盤踞要口共劄營盤二十八座勢甚猖獗先經寧海將軍固山貝子傅喇塔同副都統總兵等官親見賊營扼險拒守最爲堅固若此路不克勢難夾攻入閩因激勵官兵奮勇用命功成之日許照攻克府城之例議敘當經溫州鎮總

兵官陳世凱等親領各官兵奮不顧身衝鋒破壘并協同滿漢官兵會合進剿隨於康熙十五年八月二十一日殺賊大敗焚燬營盤斬獲甚多二十五日恢復雲和縣經固山貝子塘報大將軍康親王具

題奉有在事有功人員着議敘之

旨欽遵論臣造冊具

題茲行據各鎮營造報履前來臣查石塘天險官兵環攻難拔幸固山貝子許照攻取府城之例鼓勵議敘而總兵官陳世凱等冒險迎鋒首先破敵遊擊李回親冒矢石各官兵捐軀用命戮力疆場故能成此

大捷恢復地方在事人員功誠難泯前大將軍康親王疏內所報獲捷情形在事綠旗有功人員例難備載惟於總兵官陳世凱王廷梅之下開列等字又臣於

題報疏稱在事有功人員容臣一面查明另敘良以正戰之功未便遺漏先爲聲明在案伏乞

皇上俯念總兵官陳世凱等克此最險要害功績甚偉

勅部准照固山貝子傅喇塔鼓勵照攻克府城之例將冊內人員一體從優議敘庶立功將士益知用命除揭送吏兵二部核敘外相應

題報伏乞

皇上睿鑒施行

康熙十八年三月初七日題奉

旨該部知道

遵例自陳乞罷疏

總督浙江等處地方軍務兼理糧餉兵部尚書兼都察院右副都御史正一品臣李之芳謹

奏爲遵例自陳不職仰祈

睿鑒罷斥以重封疆以肅官守事康熙十八年正月二十日准吏部咨爲題明京察事內開查得例內京官六年考察一次今查自康熙十二年三月內考察扣至康熙十八年三月六年已滿例應考察京官其各直省督撫俱在考察京官自陳官員之例應令各直省督撫亦照例自陳考察等因奉

旨依議欽遵移咨到臣准此竊臣由順治四年進士除授
浙江金華府推官歷陞刑部廣東司主事山西司員
外郎湖廣司郎中廣西道監察御史湖廣道監察御
史掌河南道事監察御史都察院左副都御史吏部
右侍郎於康熙十二年六月內奉

旨以兵部右侍郎兼都察院右副都御史總督浙江等處
地方本年十月十五日到任除康熙十二年三月以前
事過不開外查臣於康熙十二年五月內爲遵

旨確察議奏事臣前任吏部右侍郎任內將粵省南山洋
較浦地方行劫一案都察院議以未經行查照司所

議罰俸三箇月奉

旨明珠朱之弼色塞黑冀如錫勒布楊永寧對哈納郝惟
訥陳鼓永舒恕李之芳并司官等俱從寬免罰俸餘依
議康熙十三年八月內爲遵

旨一併嚴察議奏事臣前任吏部右侍郎任內將道員丁
思孔等不行查叅經都察院議罰俸一箇月奉

旨米斯翰對哈納郝惟訥舒恕宋德宜梁清標班迪達都
勒德洪陳鼓永李之芳劉鴻儒及在部司官俱從寬免
罰俸馬紹曾董色丁思孔等俱依議康熙十四年七月
內爲特科貪酷等事因紹興府知府張三異一案擬

罪失錯部議罰俸三箇月奉

旨李之芳從寬免罰俸餘依議康熙十六年四月內爲賊首拒命流毒地方等事遣發官兵在白沙關外地方勦殺賊寇獲捷部議准紀錄二次康熙十六年六月內爲彙報勦寇獲捷情形等事遣發官兵勦撫江西鉛山等處賊寇部議加一級奉

旨李之芳着加爲兵部左侍郎兼都察院右副都御史授爲從二品照舊管事七月內准撫臣陳秉直移准吏部咨爲題明畱換馬匹事捐換進閩馬匹部議准紀錄一次康熙十六年九月內爲欽奉

上諭事部議飛報官兵大捷等事一十四案俱係臣調度
有方擒斬逆賊之案酌量議敘奉

旨李之芳着加兵部尚書仍兼都察院右副都御史授爲
正一品照舊管事康熙十七年正月內爲各路勦撫等
事遣發官兵在楊梅灘等處殺賊獲捷部議准紀錄
一次五月內爲報明委川官員事將筆帖式邵經邦
啓送福建部議罰俸一年銷去紀錄二次免其罰俸
七月內爲鄰省岐界巨寇等事遣發官兵在江西洋
塘等處殺賊并招撫陳山等部議准紀錄二次八月
內爲會勦鄰省逆寇等事遣發官兵在玉山縣屬八

仙洞等處殺賊獲捷部議准紀錄二次又爲暫移存
留可緩等事鼓勵屬員裁省錢糧十萬兩以上部議
准加一級註冊又爲遵

旨會勦恢復鄰省縣城事恢復江西玉山縣部議准加一
級註冊十二月內爲欽奉

上諭事捐解閩省馬五十匹部議准紀錄二次俱各奉
旨欽遵在案伏念微臣一介草茅遭逢

殊遇荷蒙

皇上簡授節鉞謬任巖疆入浙以來夙夜兢惕惟懼才不
勝任有負

隆恩不意受事未幾遽值閩變維時承平日久猝爾震鄰
遠近倉皇人無固志當此事勢危急之際正臣捐軀
報

國之時遂自忘其綿步馳赴衢郡首扼賊鋒調遣官兵
分路佈置申大義以勵人心捐薄資以鼓士氣督率
勦禦衝冒於矢石砲火之間總以

恩重命輕勉圖報荅屢次獲捷情形節經具

題奉

旨欽遵在案幸而仰仗

天威大兵由衢殺敗賊衆各路聞風瓦解地方旋定此皆

朝廷洪福

廟謨勝算豈臣區區智力之所能及迨浙省恢復之後民
力凋殘僅存者瘡痍未起轉徙者離散尚多兼以水
旱頻仍災荒疊見臣雖百計撫綏未能使其樂業官
兵出征多載從前摧鋒陷陣備嘗艱險迄今枕戈擐
甲尚戍疆場臣雖加意軫恤無以慰其用命至兵燹
之餘百姓困苦全在地方各官砥礪循良培養元氣
臣雖正己率屬未能有副澄清則臣不職之狀固已
難道且臣年近六旬夙抱怔忡之疾五載軍旅晝夜
靡寧內則心耗血枯外則髮白齒落精力日衰形神

俱德屢欲額陳祇以地方多故未卽上

請茲當澄敘之期敢不據實披瀝况浙省界毗山海鄰境
之逆孽方張沿海之寇踪日伺臣以衰病疎庸苟虞
貽誤在臣之一身固不足惜而所關於封疆者甚大
伏乞

皇上睿鑒亟賜處分俾臣獲免隕越當銜結於無旣矣臣
無任悚息待

命之至

康熙十八年三月十九日奏奉

旨卿才品優長簡任總督殫心料理効力行間著有勞績

着照舊供職該部院知道

遵 諭自陳乞罷疏

總督浙江等處地方軍務兼理糧餉兵部尚書兼都察院右副都御史正一品臣李之芳謹

奏爲遵

諭自陳不職仰祈

睿鑒罷斥以消災變事康熙十八年八月二十二日准吏部咨爲欽奉

上諭事內開康熙十八年七月二十八日奉

上諭諭吏部等衙門自古帝王撫御萬方兢兢業業勤求治理必期陰陽順序和風凝庥或遇災異示儆務省愆

思過實修人事挽回

天心茲者本月二十八日巳時地震之變譴告非常反覆思惟深切悚惕益由朕躬不德敷治未均用人行政多未允符內外臣工不能精白乃心恪盡職掌或罔上行私或貪縱無忌或因循推諉或恣肆虐民是非顛倒措置乖方大臣不法小臣不廉上干

天和召斯灾眚若不洗心滌慮痛除積習無以昭威格而致嘉祥朕茲力勤政務實圖修省目今應行應革事宜着部院三品以上官及科道在外各該督撫明白條奏直言無隱其在京三品以上堂官併督撫提鎮俱着據實

自陳毋得浮泛塞責爾部卽遵行仍通行曉諭內外軍民人等咸使聞知特諭欽此欽遵移咨到臣准此除康熙十八年三月已經自陳者不敢復贅外本年八月內准撫臣陳秉直咨准刑部等衙門咨爲直糾浙江學道等事因撫臣陳秉直會同薦舉程汝璞一案議降二級調用銷去軍功紀錄二次免其降調奉

旨依議在案伏念臣才識庸庸謬膺重寄前已備陳不職
亟請罷斥荷蒙

皇上寵畀溫綸照舊供職至薦舉程汝璞一案雖係撫臣主稿臣准移會亦卽書題復蒙薄加處分仍留原任

臣撫循悚懼益凜冰淵茲因地震特奉

上諭着令據實自陳臣惟地乃臣象蓋由臣下失職以致
坤輿示敬臣猥以疎賤仰荷

皇上高厚之恩雖捐糜頂踵不足報稱於萬一日身任封
疆凡安輯地方愛養百姓澄清吏治皆臣夙夜所當
黽勉以盡職守者乃自蒞浙以來旋遭寇亂黎庶死
於兵革老弱困於征徭卽底定之後田野多荒阡離
載道山海之遺孽未殄戍卒之休息無期是皆政治
多乖有負職掌積愆召變臣固無以辭其罪責也且
臣年近六旬髮白齒落居然頹朽之人况心力已竭

耳目難周浙省何地總督何官而可容其尸素倘致貽誤關係巖疆誠非眇小除臣一面痛加修省外相應據實自陳伏乞

皇上亟賜罷斥庶天變可弭而臣工咸惕矣臣無任悚息待

命之至

康熙十八年八月二十八日奏奉

旨李之芳着照舊供職該部知道

請免荒蕪地方錢糧疏

總督浙江等處地方軍務兼理糧餉兵部尚書兼都察院右副都御史正一品臣李之芳謹

題爲遵

諭陳言事康熙十八年七月二十八日因地震之變奉

上諭目今應行應革事宜着部院三品以上官及科道在外各該督撫明白條奏直言無隱欽此臣惟災變告儆上天固示以仁愛目今消弭之道補救莫急於民生如浙省自罹變亂百姓塗炭老弱溝壑男婦仳離皆數年來未有之慘惟衢台溫處四府受禍爲甚蓋界接閩

疆賊寇益起所至之處輒被蹂躪戶絕民逃田土荒蕪荆榛滿目卽平定之後百計招徠者不過十之四五其餘非死於兵革道路卽喪於飢寒疫癘而莫可問也其康熙十四十五十六年以前無徵錢糧先經臣分別請蠲荷蒙

皇上俯鑒被寇慘傷

特恩蠲免所屬殘黎歎聲手額始有更生之慶其漸次復業者僅可拮据胼胝開墾在戶之田地勉輸本身之稅糧尙苦不能成熟完課其無主荒田已絕戶口自不能代爲包賠理勢然也案經撫臣陳秉直爲備陳

荒田絕丁等事會疏

題豁未蒙

俞允臣查衢屬江山常山開化三縣台屬黃巖太平仙居
三縣溫屬永嘉樂清瑞安平陽泰順五縣處屬麗水
縉雲青田松陽遂昌雲和龍泉慶元景寧宣平十縣
俱遭淪陷又西安龍游寧海天台臨海五縣當日僅
存城邑郊外則盡屯兵馬鄉都則遍爲賊巢所在田
畝或剗寨連營或掘塚築壘悉成荒地尙之村落數
十處者今則僅畱數村或盡廢爲丘墟矣尙之煙火
數百家者今則僅存數家或且闕其無人矣兵革游

經戶口消耗豈能與承平相同此最顯而易見者古
云大兵之後必有荒年非盡雨暘弗若亦以開墾無
人漸成榛莽若一概按畝催科縣官迫於考成勢必
督責現在之民包賠貽累嗟此子遺殘喘未蘇瘡痍
未起自救不贍豈能代完無主已絕之丁糧哉況今
鄰省餘孽未靖正恐九死一生之窮黎或逃避遠方
嘯聚山谷徒滋隱患不惟荒者無補行且熟者亦荒
矣臣非不知

國用浩繁但民爲邦本身在地方目擊痼疾當此謹告
非常

皇上求言若渴之際豈敢緘默仰祈大沛

皇恩將衛台溫處屬并衛州所荒田絕丁盡行豁免則此數郡皮骨僅存之民尙可相安故里是亦消弭災變之一端也應豁荒田絕丁銀米數目俟

俞允之日容臣另造清冊送部其拋荒地土流亡人戶臣一面極力設法招徠開墾俟轉徙漸歸民力稍蘇卽當照例起科以足賦稅庶

國計民生均有賴矣如果臣言不謬伏乞

皇上睿鑒

勅部議覆施行

康熙十八年九月初十日題奉

旨九卿詹事科道會議具奏

陳言難民子女疏

總督浙江等處地方軍務兼理糧餉兵部尙書兼都察院右副都御史正一品臣李之芳謹

題爲遵

諭陳言事康熙十八年七月二十八日因地震之變奉

上諭目今應行應革事宜着部院三品以上官及科道在外各該督撫明白條奏直言無隱欽此臣惟災變示儆譴告非常必民間有至痛至慘之事哀號莫訴而後上天爲之感動地道因之不寧在今日第一疾苦則無如被搶難民子女一事也浙省自遭閩變溫處台府屬

逼近鄰封罹禍尤劇時因祖弘勳內叛以致地方淪陷固非百姓之罪也及寧海將軍固山貝子傅喇塔由台進剿賊俱敗遁回溫所在人民各安故土不宜併隨賊去

朝廷用兵救民水火正救此等水火之民耳原無可搶之處不意各旗營將恢復地面男婦子女盡行俘掠更有經由其地隨便攜帶者有之住近賊境不分涇渭混行掠帶者有之父失其子夫失其妻老弱啼號骨肉離散不可勝計臣隨出示曉飭將部文所開確正賊寇未必攜帶子女而行營中所有大率非係民人

子女卽係爲彼脅從嗣後如殺賊之餘賊寇所攜難
民子女許令民間認領不得一槩妄行搶掠奉

旨依議速行欽遵繹由通行張掛又具啓寧海將軍固山
貝子內閣樂清青田永嘉一帶先因祖宏勳從叛官
兵應援不及致將百姓失陷原出於勢不得已迨大
兵進勦確正逆賊竄入甌城此守土弗去之百姓卽
不肯從賊之百姓正在宣佈

朝廷德意招徠撫綏使其室家完聚樂業安居庶幾人皆
懷我深仁到處效順將見逆賊勢窮自相離散卽直
入八閩亦不難於開風底定今旗營掠帶子女是地

方雖復有土無人不但

朝廷財賦將來無從出產卽現在糧糈已乏人供運亦恐有誤軍機且百姓旣遭搶掠無家室繫念必至鋌而走險反得遂逆賊狡謀煽誘愚民以增賊寇關係非淺竊思大兵進取固須鼓勵士氣尤須收拾人心此被賊蹂躪之百姓孰非

朝廷之赤子祈大張清字嚴諭凡各旗營有收掠民人子女者俱令迅速給還曉諭民間認領并乞頒示各旗營官兵嚴禁搶掠庶戶口復集人心鞏固備述苦情在案未蒙查給嗣雖收復各府哀此子遺莫不奔走

四方尋求家口顛連委頓絡繹載道其環乞於臣之馬首者無日無之悉皆鳩形鵠面奄奄喘息之人臣多方設法陸續查追先後給還爲數已多旗營之內亦有憐其哀慘隱發還者亦有得受贖價聽民領歸者迄今現畱在營者皆係堅執不回非可以情理感動或潛帶入京絕其尋訪之路或勒索高價逞其無厭之求有一小子而贖至二三十金一婦人而贖至一二百兩當此生離死別之際稍可變賣騰那求乞募化皆不遺餘力取贖完聚遲至今日而不得贖者業已皮骨僅存之一身忍饑號寒口食衣被無從

措置豈尙復有餘貲再能取贖痛念此生終無會合之日呼天飲泣此種情形真不忍見聞誠足以上干天和致生災異臣伏讀

上諭用兵地方諸王將軍大臣於攻城克敵之時不思安民定難以立功名但志在肥己多掠佔小民子女或借爲通賊毒將良民廬舍焚燬子女俘獲財物攘取名雖救民於水火實則陷民於水火之中也煌煌

天語難民痾瘵隱痛固已上徹

震東矣臣竊謂變亂之禍起於閩省奉命大將軍康親王自衛入閩首禁搶掠遠近望風倒戈民間婦女俱得

保全卽渠逆歸誠餘孽就撫莫不宥其既往槩許自
新妻子家口安然無恙浙以鄰省蔓延乃至玉石不
分而溫台紹金處一帶無辜之民殃及池魚塗炭罹
於兵燹俘掠及於妻孥夫戶口者

朝廷之戶口人民者

皇上之人民豈可搶帶歸旗沒爲奴婢今用兵地方我
皇上業已洞燭俘獲隱情當此中外痛加修省之時仰祈
恩旨迅頒嚴飭確查以回
天變將浙省搶帶子女現在各旗營者立即查還難民完
聚從前遣發入京者

勅令逐一查出行臣知照各難民赴京認領將見歡聲載道禎祥自生誠爲方今第一急務蓋難民子女被帶入管其父兄夫男匍匐哀號饑寒疾病死於道路者誠難枚舉卽今立行查還猶以爲晚若徒持取贖之議責償垂斃之民黠者故勒多金忍者終於畱執此所謂畫餅充饑無濟實事臣凜遵

上諭直言無隱不敢不據實披瀝惟懇

皇上天語中嚴數萬殘黎母子夫妻立得完聚矣

康熙十八年九月初十日題奉

旨九卿詹事科道會議具奏

南鎮雙頭洞獲捷疏

總督浙江等處地方軍務兼理糧餉兵部尙書兼都察院右副都御史正一品臣李之芳謹密

題爲塘報事准福建督臣姚啓聖移送疏稿到臣案據溫州鎮總兵官陳世凱奉令會勦南鎮雙頭洞賊穴當卽遣發官兵於康熙十八年四月初三日到敵城由三墩嶺至南鎮係盤山險隘一線路影樹木叢雜難以行走官兵開砍路道逐程挨進到南鎮劄營瞭見逆賊在對山官兵分作三股扒山附葛而上砲矢齊發斬殺賊衆一百餘人賊奔海邊上船不及淹死

不計砲打壞雙篷賊船二隻三板小船五隻燒燬賊城二座等情又據平陽鎮總兵官拜音達禮報本年四月二十日官兵到桐山東山嘴東山樑堵禦瞭見賊船十七隻在海邊灣泊官兵奮力齊進賊從山窠突出官兵砲矢齊發賊敗奔船淹死甚衆其船飛駛而去二十一日抵雙頭洞對江初營見賊窠四面汪洋有三板八槳船二十餘隻茅屋三百餘間官兵發火砲攻打賊死傷不計連夜帶船奔逃將賊窠茅屋盡行焚燬訖又於五月十三日進八尺門前崎地方會水師夾勦又於二十日水陸夾攻殺死賊衆得獲

船隻駕回桐山又同桐山官兵前往搜山燒燬草樓
十餘所等情各在案臣查南鎮雙頭洞一帶俱在福
建桐山逼近之海其獲捷情形隨經移詢福建督臣
去後今准移送疏稿到臣該臣看得南鎮雙頭洞係
海賊巢穴出沒窺伺浙閩邊海飄突不常實爲門庭
之患經臣咨會福建道發官兵水陸夾剿去後今准
福建督臣姚啓聖移送疏稿內開浙省用命官兵聽
臣另疏

題報等因今將浙省官兵殺賊獲捷情形具疏

題報臣謹密

題伏乞

皇上睿鑒施行

康熙十八年十一月初一日題奉

旨兵部議奏

李文襄公奏疏卷八終